

漢武帝別國洞冥記  
甄異  
幽明  
錄附校讞



2121  
1  
02697

60403

漢武帝別國洞冥記

郭憲撰

中華書局

叢書集成初編所  
選龍威秘書陽山  
顧氏文房古今逸  
史寶顏堂祕笈漢  
魏叢書皆收有此  
書寶顏爲一卷本  
顧氏在前故據以  
排印

# 序

東漢 光祿大夫郭 憲

憲家世述道書。推求先聖往賢之所撰集。不可窮盡。千室不能藏。萬乘不能載。猶有漏逸。或言浮誕非政教所同。經文史官記事。故略而不取。蓋偏國殊方。竝不在錄。愚謂古彙餘事。不可得而棄。況漢武帝明俊特異之主。東方朔因滑稽浮誕。以匡諫。洞心於道教。使冥迹之奧。昭然顯著。今藉舊史之所不載者。聊以開見。撰洞冥記四卷。成一家之書。庶明博君子。該而異焉。武帝以欲窮神仙之事。故絕域遐方。貢其珍異奇物及道術之人。故於漢世盛於羣主也。故編次之云爾。（據古今逸史本補）

右別國洞冥記四卷。漢光祿勳郭憲撰。汝南人。卽所謂關東舡舡。郭子橫者也。出處大節。具見本傳。徒以撰酒厭火一事。降入方術。是固儼人不於其倫已。好事者因依爲此記。并託憲自序。言漢武明雋。特異之主。東方朔因滑稽浮誕。以匡諫。洞心於道教。使沉奧之跡。昭然顯著。故曰洞冥。然則此書殆卽祖述神異經。十洲記而作者也。通考又載有洞冥記拾遺一卷。陳氏謂於御覽中抄出。則四卷亦非全書。凡若是者。藏書之家。備名數而已。無之不足爲損。有之不足爲益。况於詳略。尤非所計。可謂知言。可。以蔽諸小說矣。汝上王謨識。（據漢魏叢書本補）

# 漢武帝別國洞冥記卷第一

東漢 光祿大夫郭 憲撰

漢武帝未誕之時。景帝夢一赤虺。從雲中直下入崇蘭閣。帝覺而坐於閣上。果見赤氣如煙霧來蔽戶牖。望上有丹霞蒼鬱而起。乃改崇蘭閣爲猗蘭殿。後王夫人誕武帝於此殿。有青雀羣飛於霸城門。乃改爲青雀門。乃更修飾。刻木爲綺椽。雀去。因名青綺門。

東方朔字曼倩。父張夷。字少平。妻田氏。女夷。年二百歲。顏如童子。朔生三日而田氏死。時景帝三年也。鄰母拾而養之。年三歲。天下祕識。一覽闔誦於口。常指擔天下。空中獨語。鄰母忽失朔。累月方歸。母笞之後。復去。經年乃歸。母忽見大驚。曰。汝行經年一歸。何以慰我耶。朔曰。兒至紫泥海。有紫水污衣。仍過虞淵。澗。浣朝發中返。何云經年乎。母問之。汝悉是何處行。朔曰。兒瀟衣竟。暫息都崇堂。王公飴之以丹霞漿。兒食之。太飽。悶幾死。乃飲玄天黃露。半合卽醒。既而還路。遇一蒼虎。息於路傍。兒騎虎還。打捶過痛。虎齧兒脚。傷母悲嗟。乃裂青布裳裹之。朔復去家萬里。見一枯樹。脫布掛於樹。布化爲龍。因名其地爲布龍澤。朔以元封中遊溱鴻之澤。忽見王母採桑於白海之濱。俄有黃翁指阿母以告。朔曰。昔爲吾妻。託形爲太白之精。今汝此星精也。吾却食吞氣已九千餘歲。目中瞳子色皆青光。能見幽隱之物。三千歲一反骨洗髓。二千歲一刻肉伐毛。自吾生已三洗髓五伐毛矣。

建元二年，帝起騰光臺，以望四遠。於臺上，擗碧玉之鐘，掛懸黎之磬，吹霜條之篴，唱來雲依日之曲。方朔再拜於帝前曰：臣東遊萬林之野，獲九色鳳雛，涪源丹瀨之水，赤色西過洞壑，得滄淵虬子，靜海遊珠，洞壑在虞淵西，虬泉池在五柞宮北，中有追雲舟，起風舟，侍仙舟，含煙舟，或以杪棠爲樅楫，或以木蘭文栝爲檣棹，又起五層臺於月下。

釣影山，去昭河三萬里，有雲氣，望之如山影。丹菴生於影中，葉浮水上，有紫河萬里，深十丈，中有寒荷，霜下方香盛，有降靈壇，養靈池，分光殿五間，奔雷室七間，望蟾閣十二丈，上有金鏡，廣四尺，元封中有祇國獻此鏡，照見魍魎，不獲隱形。

都夷香如棗核，食一片則歷月不飢，以粒如粟米許投水中，俄而滿大盂也。

甘泉宮南昆明池中有靈波殿七間，皆以桂爲柱，風來自香，帝旣耽於靈恠，常得丹豹之髓，白鳳之骨，磨青錫爲屑，以蘇油和之，照於神壇，夜暴雨光不滅，有霜蛾如蜂赴火，侍者舉麟拂拂之。

元光中，帝起壽靈壇，壇上列植垂龍之木，似青栝，高十丈，有朱露，色如丹汁，灑其葉，地皆成珠，其枝似龍之倒垂，亦曰珍枝樹，此壇高八丈，帝使董謁乘雲霞之輦，以昇壇，至夜三更，聞野鷄鳴，忽如曙，西王母駕玄鸞歌春歸樂，謁乃聞三母歌聲，而不見其形，歌聲遶梁三而乃止，壇傍草樹枝葉或繚或動，歌之感也。四面列種軟棗，條如青桂，風至自拂塔上遊塵。

董謁，字仲玄，武都郿邑人也，少好學，嘗遊山澤，負挾圖書，患其繁重，家貧，拾樹葉以代書簡，言其易卷懷。

也。編荆爲牀。聚鳥獸毛以寢其上。

波祗國亦名波弋國。獻神精香草。亦名荃靡。一名春蕪。一根百條。其間如竹節柔軟。其皮如絲。可爲布。所謂春蕪布。亦名香荃布。堅密如紈冰也。握一片滿室皆香。婦人帶之。彌有芬馥。

翁韓國獻飛骸獸。狀如鹿。青色。以寒青之絲爲繩繫之。及死。帝惜之而不殮。掛於苑門。皮毛皆爛朽。惟骨色猶青。時人咸知其神異。更以繩繫其足。往視之。唯見所繫處存。而頭尾及骨皆飛去。

且露池西有靈池。方四百步。有連錢荇。浮根菱。倒枝藻。連錢荇。如錢文。浮根菱。根出水上。葉沉波下。實細薄。皮甘香。葉半青半白。霜降彌美。因名青冰菱也。倒枝藻者。枝橫倒水中。長九尺餘。如結網。有野鴨。秋鳧及鷗鷺來翔水上。入此草中。皆不得出。如繒網也。亦名水網藻。中有轉羽觜。逐龍觜。凌波觜。帝嘗遊宴於此。





## 漢武帝別國洞冥記卷第二

元鼎元年。起招仙閣於甘泉宮西。編翠羽麟毫爲簾。青瑠璃爲扇。懸黎火齊爲床。其上懸浮金輕玉之聲。浮金者。色如金。自浮於水上。輕玉者。其質貞明而輕。有霞光繡。有藻龍繡。有連烟繡。有走龍錦。有雲鳳錦。飄鴻錦。閣上燒荃靡香屑。燒粟許其氣。三月不絕。進嫺幃細棗。出嫺幃山。山臨碧海上。萬年一實。如今之軟朶。昨之有膏。膏可燃燈。西王母握以獻帝。燃芳苡燈。光色紫。有白鳳黑龍。舞足來戲於閣邊。有青鳥赤頭。道路而下。以迎神女。神女留玉釵以贈帝。帝以賜趙婕妤。至昭帝元鳳中。宮人猶見此釵。黃謙欲之。明日示之。既發匣。有白鷺飛昇天。後宮人學作此釵。因名玉鷺釵。言吉祥也。

元鼎五年。邳支國貢馬肝石百斤。常以水銀養之。內玉櫃中。金泥封其上。國人長四尺。惟餌此石而已。半青半白。如今之馬肝。舂碎以和九轉之丹。服之。彌年不饑渴也。以之拂髮。白者皆黑。帝坐羣臣於甘泉殿。有髮白者。以石拂之。應手皆黑。是時公卿語曰。不用作方伯。惟須馬肝石。此石酷烈不和。丹砂不可近。髮帝寢靈莊殿。召東方朔於青綺窻。不隔絺紈重幕。問朔曰。漢承庚運。火德。以何精瑞爲祥。應。朔跪而對曰。臣常至吳明之墟。是長安東過扶桑七萬里。有及雲山。山頂有井。雲起井中。若土德王。黃雲出。火德王。赤雲出。水德王。黑雲出。金德王。白雲出。木德王。青雲出。此皆應瑞德也。帝曰善。元封中。起方山像。招諸靈異。召東方朔言其祕奧。乃燒天下異香。有沉光香。精祇香。明庭香。金磳香。塗魂

香外國所貢青燼之燈。青燼木有膏如淳漆。削置器中以臘和之塗布。燃照數里。

起神明臺。上有九天道金牀象席虎珀鎮。雜玉爲簾。帝坐良久。設甜水之冰以備洪濯。酌瑤琨碧酒。炮青豹之脯。果則有塗陰紫梨。琳國碧李。仙衆與食之。

吠勒國貢文犀四頭。狀如水兕。角表有光。因名明犀。置暗中有光影。亦曰影犀。織以爲簾。如錦綺之文。此國去長安九千里。在日南。人長七尺。被髮至踵。乘犀象之車。乘象入海底取寶。宿於蛟人之舍。得淚珠。則蛟所泣之珠也。亦曰泣珠。甜水去虞淵八十里有甜溪水。味如蜜。東方朔遊此水。得數斛以獻帝。投水於井。井水常甜而寒。洗沐則肌理柔滑。

瑤琨去玉門九萬里。有碧草如麥。割之以釀酒。則味如醇酎。飲一合三旬不醒。但飲甜水。隨飲而醒。塗山之背。梨大如升。或云斗。紫色。千年一花。亦曰紫輕梨。

琳國去長安九千里。生玉葉李。色如碧玉。數十年一熟。味酸。昔韓終常餌此李。因名韓終李。

元封三年。大秦國貢花蹄牛。其色駸。高六尺。尾環繞其身。角端有肉。蹄如蓮花。善走多力。帝使鑿銅石以起望仙宮。跡在石上。皆如花形。故陽關之外。花牛津。時得異石。長十丈。高三丈。立於望仙宮。因名龍鍾石。武帝末。此石自陷入地。唯尾出土上。今人謂龍尾墩也。

帝好微行。於長安城西夜見一螭遊於路。董謁曰。昔桀媚末喜。於膝上以金簪貫玉螭腹爲戲。今螭腹餘金簪穿痕。安非此耶。曰。白龍魚鱗。網者食之。帝曰。試我也。

元封四年，脩彌國獻駸騫，高十尺，毛色赤斑，皆有日月之象。帝以金珽爲鑲絆，以寶器盛菽以飼之。

元封五年，勒畢國貢細鳥，以方尺之玉籠盛數百頭，形如大蠅，狀似鸚鵡，聲聞數里之間。如黃鵠之音也。國人常以此鳥候時，亦名曰候日蟲。帝置之於宮內，旬日而飛盡。帝惜求之不復得，明年見細鳥集帷幕，或入衣袖，因名蟬宮。內嬪妃皆悅之，有鳥集其衣者，輒蒙愛幸。至武帝末，稍稍自死，人猶愛其皮，服其皮者，多爲丈夫所媚。

勒畢國人長三寸，有翼，善言語戲笑，因名善語國。常羣飛，往日下自曝，身熱乃歸，飲丹露爲漿。丹露者，日初出有露汁如珠也。

太初二年，東方朔從西那汗國歸，得聲風木十枝獻帝，長九尺，大如指。此木臨凶桓之水，則禹貢所謂因桓是也。其源出甜波樹，上有紫鸞黃鸝集其間，實如油麻。風吹枝如玉聲，因以爲名。帝以枝遍賜尊臣，有凶者，枝則汗，臣有死者，枝則折。昔老聃在於周世，年七百歲，枝竟未汗，僂佺生於堯時，年三千歲，枝竟未一折。帝乃以枝問朔，朔曰：臣已見此枝，三過枯死而復生，豈汗折而已哉。里語曰：年未半，枝不汗，此木五千年一濕，萬歲不枯。

太初三年，起甘泉望風臺，臺上得白珠如花一枝，帝以錦蓋覆之，如照月矣。因名照月珠，以賜董偃，盛以琉璃之筐。

太初四年，東方朔從支提國來，國人長三丈二尺，三手三足，各三指，多力善走。國內小山能移之，有澗泉。

飲能盡。結海苔爲衣。其戲笑取犀象相投擲爲樂。

東方朔遊吉雲之地。得神馬一疋。高九尺。帝問朔是何獸也。朔曰。昔西王母乘靈光輦以適東王公之舍。稅此馬遊於芝田。乃食芝田之草。東王公怒。奔馬於清津天岸。臣至王公之壇。因騎馬返。繞日三匝。然入漢關。關猶未掩。臣於馬上睡。不覺而至。帝曰。其名云何。對曰。因疾爲名步景。朔當乘之時。如鷲蹇之驢耳。東方朔曰。臣有吉雲草十頃。種於九景山東。二千歲一花。明年應生。臣走請刈之。得以秣馬。馬終不餓也。朔曰。臣至東極。過吉雲之澤。多生此草。移於九景之山。全不如吉雲之地。帝曰。何謂吉雲。朔曰。其國俗以雲氣占吉凶。若樂事則滿室雲起。五色照人。著於草樹。皆成五色露珠。甚甘。帝曰。吉雲露可得乎。朔乃東走。至夕而返。得玄露青露。盛青琉璃。各受五合。跪以獻帝。遍賜羣臣。羣臣得嘗者。老者皆少。疾者皆愈。凡五官嘗露。董謁。李充。孟岐。郭瓊。黃安也。

李充。馮翊人也。自言三百歲。荷草畚負五岳真圖而至。帝禮待之。亦號負圖先生也。

孟岐。河清之逸人也。年可七百歲。語及周初事。了然如目前。岐侍周公昇壇上。岐以手摩成王足。周公以玉笏與之。岐嘗寶執。每以衣袂拂拭。笏厚七分。今銳斷。恒切桂葉食之。聞帝好仙。披草蓋而來謁帝焉。

郭瓊。東郡人也。形貌醜劣。而意度過人。曾宿人家。輒乞薪自照讀書。晝眠眼不閉。行地無迹。帝聞其異。徵焉。

黃安。代郡人也。爲代郡卒。自云卑猥。不獲處人間。執鞭懷荆。而讀書。畫地以記數者。夕地成池矣。時人謂

黃安年可八十餘。視如童子。常服朱砂。舉體皆赤。冬不着裘。坐一神龜。廣二尺。人間子坐此龜幾年矣。對曰。昔伏羲始造網罟。獲此龜。以授吾。吾坐龜背已平矣。此龜畏日月之光。二千歲即一出頭。吾坐此龜已見五出頭矣。行即負龜以越世。人謂黃安萬歲矣。



## 漢武帝別國洞冥記卷第三

天漢二年帝昇蒼龍閣思仙術召諸方士言遠國遐方之事唯東方朔下席操筆跪而進帝曰大夫爲朕言乎朔曰臣遊北極至鍾火之山日月所不照有青龍銜燭火以照山之四極亦有園圃池苑皆植異木異草有明莖草夜如金燈折枝爲炬照見鬼物之形仙人甯封常服此草於夜暝時輒見腹光通外亦名洞冥草帝令對此草爲泥以塗雲明之館夜坐此館不加燈燭亦名照魅草採以藉足履水不沉

有夢草似蒲色紅晝縮入地夜則出亦名懷莫懷其葉則知夢之吉凶立驗也帝思李夫人之容不可得朔乃獻一枝帝懷之夜果夢夫人因改曰懷夢草

有鳳葵草色丹葉長四寸味甘久食令人身輕肌滑赤松子餌之三歲乘黃蛇入水得黃珠一枚色如真金或言是黃蛇之卵故名蛇珠亦曰鎗疾珠語曰寧失千里駒不失黃蛇珠

有五味草初生味甘花時味酸食之使人不眠名曰却睡草末多國獻此草此國人長四寸織鱗毛爲布以文石爲牀人形雖小而屋宇崇曠織風毛錦以錦爲帷幕也

烏哀國有龍爪薤長九尺色如玉煎之有膏以和紫桂爲丸服一粒千歲不饑故語曰薤和膏身生毛有掌中芥葉如松子取其子置掌中吹之而生一吹長一尺至三尺而止然後可移於地上若不經掌中吹者則不生也食之能空中孤立足不踣地亦名躡空草

帝常見彗星。東方朔折指星之木以授帝。帝以木指彗星。星尋則沒也。星出之夜。野獸皆鳴。別說謂之獸鳴星。

有紫柰。大如斗。甜如蜜。核紫。花青。研之有汁如漆。可染衣。其汁着衣不可滌。亦名闍衣柰。

有龍肝瓜。長一尺。花紅葉素。生於冰谷。所謂冰谷素葉之瓜。仙人瑕丘仲採藥。得此瓜。食之。千歲不渴。瓜上恒如霜雪。刮嘗如蜜。滓及帝封泰山。從者皆賜冰谷素葉之瓜。帝解鳴鴻之刀。以賜朔。刀長三尺。朔曰。此刀黃帝採首山之金鑄之。雄已飛去。雌者猶存。帝臨崩。舉刀以示朔。恐人得此刀。欲銷之。刀於手中化爲鵠赤色。飛去雲中。

有鵠銜火於清溪之上。鵠化成龍。

西域獻虎龍。高七尺。映日看之光如聚炬。火有童子遙見。有黃鵠白首。鼓翅於帝前。卽方朔着黃綾單衣。頭已斑白。漢朝皆異其神化。而不測其年矣。

善苑國嘗貢一蟹。長九尺。有百足四螯。因名百足蟹。煮其殼。勝於黃膠。亦謂之蟹膠。勝於風喙之膠也。

帝常夕望東邊。有青雲起。俄而見雙白鶴集臺之上。倏忽變爲二神女。舞於臺。握風管之簫。撫落霞之琴。歌青吳春波之曲。帝舒闍海玄落之席。散明天發日之香。香出胥池寒國。地有發日樹。言日從雲出。雲來掩日。風吹樹枝拂雲。開日光也。亦名開日樹。樹有汁滴如松脂也。

有玄都翠水。水中有菱碧色。狀如雞飛。亦名翔雞菱。仙人堯伯子常遊翠水之涯。採菱而食之。令骨輕。兼



身生毛羽也。

有遠飛雞。夕則還。依人。曉則絕飛。四海。朝往夕還。常銜桂枝之實。歸於南山。或落地而生。高七八尺。衆仙奇愛之。對以釀酒。名曰桂醪。嘗一滴。舉體如金色。陸通嘗餅黃桂之酒。祝雞公善養雞。得遠飛雞之卵。伏之名曰翻明雞。如鴿。大色紫。有翼。翼下有目。亦曰目羽雞。

帝於望鵲臺。西起俯月臺。臺下穿池。廣千尺。登臺以眺。月影入池中。使仙人乘舟弄月影。因名影娥池。亦曰眺蟾臺。酌雲菹酒。菹以玄草。黑麩。金蒲。甜蓼。果以青櫻。龍瓜。白芋。紫葢。寒蕨。地花。氣葛。此葛於地下生。入地十丈。乃得此葛。其根倒出。亦名金虎鬚草。因名紫鬚葛也。

影娥池中有遊月船。觸月船。鴻毛船。遠見船。載數百人。或以青桂之枝爲棹。或以木蘭之心爲楫。練實之竹爲篙。紐石脈之爲繩纜也。石脈出晡東國。細如絲。可縫萬斤。生石裏。破石而後得。此脈縈緒如麻。紵也。名曰石麻。亦可爲布也。

影娥池中有甕龜。望其羣出岸上。如連璧。弄於沙岸也。故語曰。夜未央。待龜黃。影娥池北作鳴禽之苑。有生金樹。破之。皮間有屑如金。而色青。亦名青金樹。有司夜雞。隨鼓節而鳴不息。從夜至曉。一更爲一聲。五更爲五聲。亦曰五時雞。有喜日鵝。至日出時銜翅而舞。又名曰舞日鵝。

有升蕩鴨。赤色。每止於芙蓉上。不食五穀。唯師葉上垂露。因名垂露鴨。亦曰丹毛鹿。